

**Agong Dan Raja Permaisuri Berangkat Hadiri Jamuan Menjunjung Kasih Bernama
11 Disember, 2011**

KUALA LUMPUR, 11 Dis (Bernama) -- Tuanku Tuanku Mizan Zainal Abidin berangkat menghadiri majlis santapan menjunjung kasih sempena tamat tempoh pemerintahan Seri Paduka sebagai Yang di-Pertuan Agong ke-13, di Istana Negara di sini Sabtu malam.

Turut berangkat Raja Permaisuri Agong Raja Tuanku Nur Zahirah.

Keberangkatan tiba Seri Paduka berdua disambut Perdana Menteri Datuk Seri Najib Tun Razak, Timbalannya Tan Sri Muhyiddin Yassin dan Menteri Penerangan Komunikasi dan Kebudayaan yang juga Pengerusi Jawatankuasa Induk Acara Tamat Tempoh Pemerintahan Seri Paduka Baginda Yang di-Pertuan Agong ke-13 Datuk Seri Dr Rais Yatim.

Turut hadir isteri Perdana Menteri Datin Seri Rosmah Mansor, isteri Timbalan Perdana Menteri Puan Sri Norainee Abdul Rahman, isteri Rais, Datin Seri Maznah Rais, bekas Perdana Menteri Tun Dr Mahathir Mohamad yang diiringi isteri Tun Dr Siti Hasmah Mohd Ali, dan Tun Abdullah Ahmad Badawi serta isteri Tun Jeanne Abdullah.

Tuanku Mizan bertitah kerajaan di bawah pentadbiran Najib telah memberikan kerjasama cemerlang sepanjang tempoh pemerintahan baginda.

"Ia secara langsung membolehkan beta melunaskan amanah selaku Ketua Negara dengan sebaik-baiknya demi negara kita yang tercinta ini," titah baginda.

Tuanku Mizan bertitah Yang di-Pertuan Agong mempunyai peranan sangat luas dalam menyumbang bakti kepada pertiwi melalui usaha dan pendapat, baik secara langsung mahupun tidak langsung untuk menjana, memupuk perpaduan pada kalangan rakyat, menyokong tindakan kerajaan ke arah memakmurkan negara dan memperkukuhkan syiar Islam di Malaysia.

"Pengalaman menerima khidmat Abdullah dan Najib menyedarkan beta betapa bertuahnya Malaysia dan rakyatnya kerana proses peralihan kuasa antara kedua mereka berjalan lancar.

"Beta amat sukacita apabila saban tahun dipersembahkan dengan laporan-laporan ekonomi dan pembangunan negara yang menunjukkan hasil yang baik dan mendengar taklimat dan membincangkan hal ehwal pentadbiran negara, sebagai mana yang dipersembahkan oleh kedua-dua perdana menteri itu.

"Beta ingin berpesan kepada pemimpin negara dan rakyat Malaysia untuk terus berusaha memupuk, memelihara dan mengeratkan lagi perpaduan yang sedia ada dan beta memandang berat kecederungan pihak-pihak tertentu membangkitkan isu-isu sensitif dan berbaur perkauman serta mempolitikan perkara-perkara yang tidak sepatutnya," titah Tuanku Mizan.

Baginda juga menyeru semua pihak supaya menjunjung kedaulatan undang-undang dan keluhuran Perlembagaan, Raja-Raja Melayu, kedudukan Islam sebagai agama bagi Persekutuan dan kedudukan istimewa orang Melayu serta kaum lain sebagaimana termaktub dalam Perlembagaan Persekutuan.

Selain itu, Tuanku Mizan bertitah antara kunjungan ke luar negara yang memberi kenangan manis ialah apabila berpeluang menjadi ketua negara Islam pertama menjejakkan kaki ke benua Antartika dan berpeluang menerokainya bersama saintis yang berpengalaman.

Sementara itu, Najib dalam ucapannya menzahirkan penghargaan kepada Yang di-Pertuan Agong sepanjang tempoh pemerintahan baginda.

"Patik secara peribadi melafazkan keserasian amat sangat patik berurusan dengan Tuanku dalam semua hal. Sesungguhnya di bawah pemerintahan Tuanku, urusan berjalan dengan licin dan lancar. Hakikat ini amat dihargai oleh anggota jemaah menteri, yang berassa amat senang dengan peranan Tuanku sebagai ketua negara," katanya.

Beliau berkata institusi Yang di-Pertuan Agong sebagai ketua negara adalah unik untuk Malaysia dan harus dipertahankan oleh rakyat.

"Ia milik semua, jangan sesekali ada pihak mencuba bermain api untuk mencabarnya (institusi diraja)," kata Najib sambil menambah kerajaan sentiasa berusaha memelihara dan melindungi Perlembagaan Persekutuan.

Najib berkata kerajaan dan rakyat berasa bangga atas keprihatinan Tuanku Mizan sebagai raja berjiwa rakyat selain turut aktif dengan kerja amal dan kebajikan dan kesukanan.

Rais pula dalam ucapannya berkata selama lima tahun pemerintahan Seri Paduka, Malaysia terus maju dari satu tahap ke tahap yang lebih tinggi.

"Sesungguhnya, pelbagai dasar dan amalan di bawah gagasan 1Malaysia membuktikan bahawa putik sudah menjadi buah, cita-cita sudah menjadi kenyataan dan didoakan, berkat sentuhan dan naungan Tuanku sebagai payung kedaulatan negara, keadaan ini terus berkekalan jua hendaknya," katanya.

Sultan Kedah Sultan Abdul Halim Mu'adzam Shah dipilih sebagai Yang di-Pertuan Agong ke-14 yang akan berkuat kuasa pada 13 Dis ini untuk tempoh lima tahun.

Sultan Kelantan Sultan Muhammad V pula dipilih menjadi Timbalan Yang di-Pertuan Agong bagi tempoh yang sama.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=633346>